

Puteri Sokong Pindaan AUKU
mStar Online
November 30, 2011
Oleh SALWA SHA'ARI

KUALA LUMPUR: Ketua Pergerakan Puteri Umno, Datuk Rosnah Abdul Rashid Shirlin berkata, Puteri menyokong keputusan kerajaan untuk meminda Seksyen 15 Akta Universiti dan Kolej Universiti (AUKU) yang membenarkan mahasiswa untuk menyertai politik.

Beliau menambah, kesediaan untuk meminda AUKU menjadi lambang kepercayaan kepada mahasiswa yang merupakan kelompok terbesar berpengaruh di dalam golongan muda.

"Jangan sesekali kita khuatir universiti adalah sarang pembangkang, sedangkan hakikatnya begitu ramai mahasiswa yang menjadi aset kepada kita.

"Cuma peluang tidak dibuka dan ruang jarang disediakan serta kerana kurangnya rasa percaya kita, permata-permata negara ini tidak digilap dan kemilaunya dibiarkan malap," katanya semasa menyampaikan ucapan dasar pada Persidangan Perwakilan Tahunan Pergerakan Puteri Umno di sini, Rabu.

Beliau juga berkata, golongan mahasiswa tidak boleh disekat kebebasannya untuk berfikir dan perlu didekati dan difahami agar mereka boleh memahami kesucian perjuangan Puteri.

Selain itu, Rosnah juga memberitahu, Puteri perlu bijak dan matang dalam mengendalikan media baru kerana masyarakat bukan lagi bodoh untuk hanya menerima setiap cerita secara membabi buta.

"Politik dan media baru sudah menjadi begitu sehati. Jika betul strategi media, kita boleh menuai hasil yang lebih daripada munasabah dalam sesebuah perjuangan.

"Media adalah senjata baru politik. Kita tidak mahu media baru ini hanya menjadi senjata yang begitu sinonim dengan pembangkang," tambahnya.

Beliau juga berkata, Pergerakan Puteri Umno sentiasa mengalu-alukan blogger-blogger untuk berbincang bagi mencari pendekatan yang paling berhikmah dalam memenuhi tuntutan politik.

Selain itu, Puteri juga menurutnya akan terus memperkasakan setiap ahlinya dengan asas pengetahuan dan kemahiran untuk mengendalikan dan menguruskan media baru supaya tidak tersasar daripada landasan perjuangan yang sebenarnya.

Hakcipta Terpelihara © 1995-2011 Star Publications (Malaysia) Bhd
Source:

http://mstar.com.my/berita/cerita.asp?file=/2011/11/30/mstar_berita/20111130145935&ec=mstar_berita